

Laoch Spóirt



AR
THÓIR
AN
DÚSHLÁIN

James Morrissey

Le Liam de Lása

Cad é mar athruithe agus toirmeasc atá buailte le mí anuas. Daoine sáinnithe ina dtigh féin gan de shaoirse acu gnáthchúramaí a saoil a dhéanamh. Fé mar a dúirt fear uasal ar an Nuacht le déanaí: “Braitheann daoine go bhfuilid i ngéibheann”.

Bhuel, tá tuiscint níos fearr ag James Morrissey ar thréimhse a chaitheamh i ngéibheann agus na dúshláin idir chorp is aigne a bhaineann lena leithéid ná mar atá ag mórán againn.

RÁS NA FARRAIGE

Um an dtaca seo anuraidh do bhí James agus a chomrádaithe leath slí trasna an Atlantaigh i mbád rámhaíochta. Seisear acu ó thíortha éagsúla san Eoraip ar thóir curiarracht dhomhanda ag rámhaíocht ó thalamh na hEorpa an tslí ar fad trasna go dtí mórthír Mheiriceá Theas. Gan mar fhóirithint acu ó chantal na farraige móire ach bád beag bídeach le linn an aistir. Do bhí an turas taiscéalaíochta seo simplí a dhóthain, bheadh dhá uair an chloig le caitheamh acu ag rámhaíocht agus dhá uair an chloig ag aimsiú spáis dóibh féin chun néal codlata a fháil. An patrún san gan stad go dtí go leagfaidís cos ar thalamh Mheiriceá.

B'fhada ón mbaile a bhí sé cinnte. Ach níos faide fós ó Ardán Uí Bhreathnaigh i bPáirc Uí Nualláin. Mar ba ann a sheas sé siar sa bhliain 2011 cúpla nóimeat tar éis dó Craobh Iomána Naomh Pádraig fé 21 Roinn 'A' a bhuachaint agus eisean ag glacadh na cailíse ar a son. Níor thugas suntas ar bith dó mar sin gur geansaí marún agus bán a bhí ar a dhroim aige agus an bád ag teacht isteach go dtí an ché ag French Guiana tar éis 51 lá a chur de ag rámhaíocht ar bhás agus ar dhícheall ar an uisce. Gaisce déanta arís ach adhmaid de bhunús éagsúil á luascadh go caitréimeach san aer an uair seo.

Shamhlófá gur ar na páirceanna uaine a bhainfeadh sé clú agus cáil amach i ndiaidh ghaiscí a óige ach bheartaigh sé ar bhóthar nua a thógaint.



Bóthar na ndúshlán a d'fhéadfá a thabhairt air. Thosaigh sé leis na maratóin agus táid déanta aige in áiteanna fud fad na cruinne anois. Ó mharatón i dteaspach 30 céim Celsius ar Bhalla Mór na Síne go dtí an truíp 200 ciliméadar mar chuid de Bhealach Chiarraí, tá sé déanta ar fad ag James fén dtráth seo. Bhí cleachtadh ag a chorp ar straidhn mhínádúrtha mar sin rud a d'fhág nach raibh ach deacracht bheag amháin aige agus é ag ullmhú i gcomhair shaol na farraige. B'in nach raibh maide rámhaíochta riamh ina lámh aige.

ÍOBAIRTÍ SUNTASACHA

D'éinne nach bhfuil i dtiúin leis an spórt nó scála an dúshlán, do bhí air éirí as a chuid oibre, airgead 14000 euro a chur ar leataobh agus sé mhí dá shaol roimis a chaitheamh ag traenáil a choirp don tréimhse a bhí le teacht. Ag maireachtáil ar an ngannchuid do bhí veain champála fachta aige agus ba ann a chuir sé faoi fad is a bhí an diantraenáil ar bun.

Tuigean tú anois a léitheoir dhil canathaobh gur cheapas go raibh sé imithe glan as a mheabhair nuair a chuala a chaint faoin turas ar dtús. Ach mo léan do dhein sé an beart agus tháinig an solas fé dheireadh.

Anois agus bliain imithe idir an dá linn, d'fhéadfá a rá go bhfuil an domhan ar fad ag déanamh a mbealaigh trí farraige fhiáin an Vírís. Amhail James agus a chomrádaithe buanseasmhacha, bíonn an farraige seo míthrócaireach orainn ar uairibh gan éachtaint againn ar dheireadh an bhóthair go fóill ach molann James dúinn ár misneach a choimeád.



Tá dóchas dúinn ar fad in san méid a bhí le rá aige áfach: "Sea, bhí sé crua, bhí laethanta ann cinnte go raibh mo chraiceann ag dó le pian mharfach gan aon leigheas agam air. Laethanta eile do bhí ocras orm agus mo chorp ag dul i léig dá bharr." Ach dá fhad a mhair an cruatan thánadar as.

Tiocfaimid as seo chomh maith agus luath nó mall caithfear an sliotar bán isteach arís ar pháirceanna ó cheann ceann an oileáin. An mbeidh James le feiscint i ngeansaí an pharóiste bhig arís áfach? Bhuel, sin ceist do lá éigin eile b'fhéidir. Ná cuirimis as an áireamh é.

Tírdhreach - Landscape
Breithiúnas - Judgement
Géibheann - Captivity
Curiarracht Dhomhanda - World Record
Fóirithint - Shelter/Aid
Turas Taiscéalaíochta - Expedition

Balla Mór na Síne - Great Wall of China
Straidhin Mhínádúrtha - Unnatural Strain
Íobairtí - Sacrifices
Ag Maireachtáil - Surviving/Living
Comrádaithe - Comrades
Buanseasmhach - Persistent

Cúinne na bPáistí

Cuardach Focal

E	U	A	S	T	R	A	I	D	H	N	A	H	O
E	G	M	H	R	T	R	R	S	A	R	U	T	B
A	M	A	R	S	G	E	L	O	A	S	A	H	U
S	I	I	E	A	R	R	A	H	S	E	H	E	A
A	L	D	A	G	E	S	R	S	M	H	H	S	N
E	A	E	A	A	I	E	M	D	P	M	N	L	S
H	D	E	A	C	R	A	C	H	T	A	T	L	E
G	R	B	E	D	C	T	R	D	A	L	C	M	A
I	G	E	B	A	L	L	A	R	L	A	E	H	S
E	A	A	A	R	A	N	U	O	A	T	A	A	M
L	I	R	A	N	A	L	G	I	C	F	R	A	H
A	S	T	L	G	B	S	S	L	S	R	S	A	A
I	C	M	I	S	N	E	A	C	H	C	A	H	C
F	E	A	R	S	I	H	R	A	C	E	E	S	H

FARRAIGE
FEAR
TEASPACH
BEART
DEACRACHT
STRAIDHN
MISNEACH
UISCE
BUANSEASMHACH
MAIDE
TALAMH
LEIGHEAS
BALLA
GLAN
GAISCE
SAOL
TURAS
OCRAS